



Vierzäände Joorgang

Fasnacht 2011

## Die Gsalzene

D' Schugger Sepp und Gushti faare stolz im neie Straiffewaage  
Nur die blau-wyss Zyrcherfaarb isch fir die baide kuum z' ertraage  
Druff maint dr Sepp: «Los Gushti, s' hätti schlimmer kenne koo  
Wenn dr Lips hätt derfe wääle hätt er roosarooti gnool»

Noch dr Royal Wedding wird die scheeni Katy rund und drall  
Dr Frauearzt said voller Fraid bim erschte Ultraschall:  
«S' Kind kunnt noch em Opi Charles, doch waiss I noni mee  
Denn wäg' de grosse Oore kamme s' Zipfeli nid gsee!»

Zwai Dunnelboormaschine hänn dr Gotthard-Durchbruch gschaft  
Dangg dr Gabi und dr Sissi hett me boort mit voller Graft  
Am Wysebärg do nämm me schyynts e syydländisch Modäll  
Dr «Silvio B.» boort nur im junge Gstai derfir dopplet so schnäll

Bi dr Novartis gniesse d' Zolli-Affe artgerächti Haltig  
Verdiene sich Banaane als Berooter fyr d' Vrwaltig  
Das deent grotesgg – e Wältkonzärn wo gmanaged wird vo Affe  
In der UBS ischs no verruggter – deert dien Bängger schaffe

D' Elephantedamme SABU hett bim Knie e Stell bikoo  
In Zyyri hett si illegal dr Arbetsblatz vrloo  
Si hett gheert d' Tournee gieng z' Dytschland wyter, das haig're no gfäält  
Drumm haig si z' Zyyri welle blybe und so 's glainre Ybel gwäält

Dr Doggder Guttebärg isch nimme Doggder, hett z' vill plagiiert  
Das isch wemme duet als wärs vo aim, drby isch's nur kopiert  
So Vorwurf dien dr Hakan Yakin nie in d' Ängi dryybe  
Denn zem Plagiat verfasse, miest äär zerscht mol leere schryybe

An dr GV vo de Sioux im Indianerreservat  
Said dr Haptlig «Fetter Elch» zem Haptlig «Kleiner Kopfsalat»:  
«Scheen, dass Du wider Rauchzaiche trotz Rauchverbott duesch staarte.»  
Druff maint dr ander: «Kai Brobleem, ha jetz e Fūmoar-Kaarte.»

Au mir Gsalzene sinn mittlerwyyle «Whistleblower-Freaks»  
Drumm schängge mir dä Helge noch dr Fasnacht Wikileaks  
Denn dä verrootet schoonigslos und bitz' imberdinänd  
Was dr Morin glaischtet hett im Breesidialdebardemänd

## e Langvärs...

Vo Fränggedorf bis Ammel, vom Bölche bis zem Rhyh  
Do läbbd e gspässig Velggli – e glai bitz' hindedryy  
Ääne an dr «Hülffe» – do stosch zeerscht lang im Stau  
Denn heersch e Dialäggd do wird's Dr grad im Maage flau  
Noch 10 Mynuute loose mainsch, die sige alli blau

Die Oberbaselbieter sinn schyynts Kulduurbanause  
Drby gitte d' Laiebiini in der Meerzwägghalle Lause  
S' Topevent deert obe sinn d' Filmfeschtspiil in Ammel  
Wär deert brilliert dä griegt als erschte Bryys dr goldig' Rammel  
Wär deert brilliert dä griegt als erschte Bryys dr goldig' Rammel

Si «nuumte» und si «guubte», statt «saage» dien si «sääge»  
Und d' Topnews in dr «Volksstimm»: «In Lampebärg gitte Rääge!»  
Die sinn ganz Haimlifaissi – erotisch herrscht kai Noot  
Heersch «Titterte» und «Ramlnsburg», denn waisch um was es goot juheel!  
Und was si sunsch no dryybe wämmer lieber gar nid gsee

## ... und dr Monschervärs

Dr Schwyzer Maa seg' schyynts e Hächt  
Drby isch er numme e Gnächt  
Isch sich go d' Lääbensfraid verbaue  
40 Joor Stimmrächt vo de Fraue

D' Fraue sinn e woori Graft  
Beryychere d' Bolytlandschaft  
Dien iiri Mainig nid verstegge  
Wuchtigi «JEIN» in d' Urne legge

Fir die briefligg Stimmaabgoob  
Sinn unsri Fraue voller Loob  
So mien sie sich nie mee blamiere  
Bim Versuech vor Ort z' parggiere

S' Bundeshuus het reagiert  
Und alli Pissoir abmontiert  
Will Fraue wääle glaar und drogge  
Nur Männer wo bim Brinze hogge

Dr Bundesroot isch au tangiert  
Wird nei vo Daame dominiert  
Und d' Heere kenne kuum erwarte  
Als Metrosexuelli z' starte

Dr Maurer muss sich syni Haxe  
Drum jede Morge frisch loo waggse  
Dr Schneider-Amman macht au mit  
Doch d' Sträppli ripse ihm im Schritt

Wär dr Blocher no drby  
Kennt au er e Kätzli syy  
Doch wettsch als Frau iin bräsentiere  
Muesch zeerscht e Hiirni implantiere

Dr Merz maint zue dr Widmer-Schlumpf:  
«Fir mii bisch Du en ächte Drumpf  
Du machsch mi rasend, denn Du waisch  
Yy stand uff Bü.. Bü.. Bündlerflaisch!»

Und dr Silvio Berlusconi  
Dä steert das Frauetheema nooni  
Fir iin zelld numme kurz und bündig  
Sinn si willig und gnabb mündig?

Die Situation kennt eskaliere  
Wie sotti d' Schwyz druff reagiere?  
S' gitt nur ai Wäg us däre Noot  
Die Gsalzene in Bundesroot!

[www.diegsalzene.ch](http://www.diegsalzene.ch)

Wotsch d Fasnacht mol vo inne gsee - kumm doch zue dr BSG! [www.bsg-online.ch](http://www.bsg-online.ch)